

# ԶԱՐԳԱՑՄԱՆ ԵՎ ԿԻՐԱՌԱԿԱՆ ՀՈԳԵԲԱՆՈՒԹՅՈՒՆ

## ՍՐԲՈՒՀԻ ԳԵՎՈՐԳՅԱՆ

*Իւսչարտր Արտիսանի անվան հայկական պետական մանկավարժական համալսարանի ուսումնագիտական գծով պրոռեկտոր, հոգեբանական գիտությունների դոկտոր, պրոֆեսոր*

## ԱՆՆԱ ԽԱՉԱՏՐՅԱՆ

*Իւսչարտր Արտիսանի անվան հայկական պետական մանկավարժական համալսարանի Կրթության հոգեբանության և սոցիոլոգիայի ֆակուլտետի Զարգացման և կիրառական հոգեբանության ամբիոնի հայցորդ*

## ԱՆՁԻ ԿՐՈՆԱԿԱՆ ՆՈՒՅՆԱԿԱՆԱՑՈՒՄԸ ՍՈՑԻԱԼ-ՀՈԳԵԲԱՆԱԿԱՆ ՀԱՅԵՑԱԿԵՏԻՑ

Հոդվածում ներկայացված է անձի կրոնական նույնականացման սոցիալ-հոգեբանական դիտարկման առանձնահատկությունները, խնդրի ուսումնասիրման մեթոդոլոգիական հիմքերը և հեռանկարները: Ինդիքը լուսաբանվում է անձի սոցիալական նույնականացման բնորոշման միջոցով, որտեղ կարևորվում են սոցիալական միջավայրում անձի սոցիալ-հոգեբանական դրսևորման եղանակները:

*Հանգուցային բառեր և արտահայտություններ՝* կրոնական նույնականացում, սոցիալական նույնականացում, էթնիկ ինքնություն, հաղորդակցում, սոցիալական միջավայր, հոգեբանական տարածություն:

Կրոնական պատկերացումների ժամանակակից դրսևորումները չափազանց հարուստ են և բազմազան: Դրանց պատմականորեն ձևավորված, սերնդեսերունդ փոխանցված արտահայտությունները յուրովի արտահայտում են աշխարհի մասին անձի ընկալումները, զգացմունքներն ու վերաբերմունքը:

Նրանք վեր են հանում մտածելակերպի այնպիսի խորքային շերտերը, որոնք ստացել են հասարակական որոշակի արձագանք և ներառվել են հասարակության աշխարհայացքային դրսևորումների մեջ: Կրոնական նույնականացման հասկացությամբ շրջանակը սերտ կապերով կապված է հարակից գիտությունների նվաճումների հետ: Ուստի, անձի կրոնական նույնականացման սոցիալ-հոգեբանական արտահայտությունների պատշաճ ուսումնասիրումը կարելի է իրականացնել հարակից մի քանի գիտությունների շրջանակներում, որոնք այս կամ այն կերպ առնչվում են վերը նշված թեմային՝ սոցիալական հոգեբանության, սոցիոլոգիայի, ազգագրության, լեզվաբանության և այլն՝ քաղելով նրանցից կրոնականության սոցիալական հայեցակետերը:

Կրոնական նույնականացման երևույթը՝ լինելով անձի սոցիալական նույնականացման ձևերից մեկը, նախկինում գրեթե չի ընդգրկվել սոցիալ-հոգեբանական ուսումնասիրության

շրջանակներում: Պատճառները կարող ենք փնտրել թեև ինչպես խնդրի ուսումնասիրման բարդության, այնպես էլ՝ թեմայի միջոցիսցիպլինար բնույթի մեջ: Այժմ հոգեբանության մեջ նկատելիորեն աճում է հետաքրքրությունը խնդրի վերաբերյալ [6;9, էջ 70–114.]: Քննելով այն սոցիալ–հոգեբանության դաշտում, ուրվագծվում է հասարակական կարծիքը և պատկերվում որպես հասարակության հետ անձի հաղորդակցման եղանակներից մեկը [2, էջ 256]:

«Նույնականացման» հասկացությունը կրում է միջոցիսցիպլինար բնույթ: Նրա ուսումնասիրության շրջանակը ձևավորվել է ընդհանուր հոգեբանական և սոցիալ–հոգեբանական հետազոտությունների շնորհիվ, որոնք ներկայացված են Է.Էրիքսոնի, Զ.Ֆրեյդի, Կ.Գ.Յունգի [21;17;18;22] և այլոց կողմից: Նույնականացման հետագա ուսումնասիրություններն իրենց զարգացումն են գտել միջխմբային հարաբերությունների հոգեբանության մեջ: Նշանակալի ներդրում է կատարել սոցիալական նույնականացման կոնցեպտը Ա.Թեջֆելի կողմից և Զ.Թերների ինքնակատեգորիզացիայի տեսությունը [25]:

Փաստորեն, խոսքը գնում է անձի սոցիալապես կարևորվող կրոնական արտահայտությունների մասին, որոնք բնորոշ են տվյալ հասարակությանը: Դրանց առաջին անգամ անդրադարձել է Մ.Էլիսադեն՝ որպես անձի սրբազան արտահայտությունների[20]:

Ինչպես տեսնում ենք, անձի սոցիալական և, մասնավորապես, կրոնական նույնականացման երևույթի լուսաբանումը հոգեբանական գրականության մեջ հանգում է, ընդհանուր առմամբ, անձի հասարակության հետ փոխգործողությունների բացահայտմանը: Այն կարող է ներկայացվել որպես հասարակության մեջ անձնային զարգացման

դրսևորումներից մեկը: Դատելով խնդրի միջոցիսցիպլինար բնույթից, կարող ենք փաստել բազմաթիվ գիտական վկայությունների մասին, որոնք այս կամ այն կերպ առնչվում են կրոնական նույնականացման սոցիալ–հոգեբանական հայեցակետին:

Սոցիալ–հոգեբանական հայեցակետից կարևորվում են կրոնի այնպիսի դրսևորումները, որոնք լինելով անձի ինքնաարտահայտման միջոց, արտացոլում են հասարակության էթնոհոգեբանական գոյության և ինքնության յուրահատկությունը: Կրոնական նույնականացման դրսևորումներն ի հայտ են գալիս անձի սոցիալականացման պրոցեսների հետ զուգընթաց՝ որպես սեռատարիքային, սոցիալական, հոգևոր և զարգացման այլ չափանիշների հանրագումար: Այդ գործընթացի արդյունքում անձը ձեռք է բերում համապատասխան սոցիալական դեր, որի կատարման համար կիրառում է տարբեր մոտեցումներ և դիրքորոշումներ: Անձի կրոնական նույնականացման և՛ սոցիալական, և՛ անհատական երկակի բնույթը բացահայտելու համար անհրաժեշտ է վեր հանել հասարակության առասպելաբանական աշխարհայացքը, որն ընկած է ցանկացած կրոնական մտածելակերպի հիմքում: Ըստ առասպելի սոցիոլոգիական սահմանման՝ առասպելը կրոնական հավատքի հիմնական դրույթների ամբողջություն է, որն արտահայտվում է որոշակի պատմությունների մեջ: Եվ այդ պատմությունները երբեք չեն ընկալվում որպես ուղղակի անցյալում կատարվածի նկարագրություն: Նույնիսկ մակերեսային հայացքը ցույց է տալիս, որ առասպելը որոշ առումով կրոնական դրույթների բացահայտումն է [13, էջ 278]: Դա հրաշքային իրադարձության «իրական» նկարագրություն է, որն որոշում է աշխարհի կառուցվածքը և բարո-

յական արարքի էությունը [13, էջ 281]:

Այդ պատճառով, բացահայտելու համար անձի կրոնական նույնականացման խորին շերտերը, անհրաժեշտ է գուգահեռներ տանել հասարակության առասպելական մտածելակերպի առանձնահատկությունների հետ: Ուստի, այդ խնդրի լուսաբանմանն անուղակի կերպով անդրադարձել են մի շարք մարդաբան-մշակութաբաններ: Հայտնի մարդաբան Բ.Մալինովսկին հետևյալ կերպ է անդրադառնում կրոնի սոցիալական կողմին: Նա կրոնի որպես ամբողջություն, առանձնահատկություններից է համարում պաշտամունքների տոնական և հասարակական բնույթը: Նա գտնում է, որ պարզունակ հասարակություններում պաշտամունքի հասարակական բնույթը, կրոնական հավատալիքի և սոցիալական կազմակերպության փոխօգնությունը նույնքան են արտահայտված, որքան զարգացած հասարակություններում [13, էջ 55]:

Անձի կրոնական նույնականացումն արտահայտում է ինչպես զուտ անհատական ծիսա-պաշտամունքային վարքագիծը, այլ կերպ ասած՝ անհատի վարքի «կրոնական» բաղադրիչը, այնպես էլ այդ կրոնականի սոցիալական դրսևորումները՝ «կոլեկտիվը»: Մա կրոնական մտածելակերպի յուրահատկություններից մեկն է, երբ կոլեկտիվ վարքագիծը /ուխտագնացություն, եկեղեցական տոնակատարություններ և այլն/ համատեղվում է անհատական վարքագծով /անձի կրոնական ապրումները, պատկերացումները և այլն/:

Ընդհանուր առմամբ, տվյալ խնդրի շրջանակներում կարևորություն են ներկայացնում հետևյալ առանցքային հարցադրումները. ինչպե՞ս է անձը ճանաչում իր միջավայրը, ի՞նչ գլխավոր համեմատականներ է տանում հարազատ և օտար միջավայրերի միջև, ո՞ր

չափանիշների շնորհիվ է առանձնացնում կրոնական արտահայտությունները հասարակությունում, և ինչպե՞ս է վերաբերվում նրանց: Այսպիսով, կրոնական նույնականացման երևույթի մեջ խտացված կերպով կարող են արտահայտվել անձի էթնո-սոցիալական նույնականացման յուրահատկությունները, որոնք էլ կվկայեն ազգային ինքնության և գիտակցության տարբեր կողմերի մասին: Անձի կրոնական նույնականացման ուսումնասիրության խնդիրը, ուրեմն, որոշակի չափով առնչվում է անձի շրջակա աշխարհի հետ հաղորդակցվելու հարցին: Ուստի, ունի և՛ գիտական, և՛ կիրառական հսկայական նշանակություն: Այն հանդես է գալիս որպես անձի սոցիալ-հոգեբանական զարգացման, հասարակության մեջ ինտեգրվելու և ինքնառեալիզացիայի հզոր լծակ [12, էջ 16, 25-26]: Անդրադառնալով անձի կրոնական նույնականացման սոցիալ-հոգեբանական մանրամասներին՝ ուղղակիորեն վեր են հանվում հաղորդակցման ուսումնասիրման բազմաբնույթ հարցադրումները: Ա.Ն.Լեոնտևը այսպես է գրում հաղորդակցման կարևորության մասին. «Անձի վերաբերմունքն իրեն շրջապատող առարկայական աշխարհի նկատմամբ միշտ միջնորդավորված է մարդկանց և հասարակության նկատմամբ իր վերաբերմունքով» [11, էջ 364.]: Հնարավոր չէ ի նկատի չունենալ այս պարագան, քանի որ նպատակահարմար չէ ուսումնասիրել մարդուն հաղորդակցման իր միջավայրից, այն սոցիալական հարաբերություններից դուրս, որոնք նրա ձևավորման հիմնական պայմաններն են: Կոլեկտիվի՝ որպես հաղորդակցման միջավայրի, ուսումնասիրության կարևորությունը նշել է նաև Վ. Մ. Բեխտերը, որի համոզմամբ կոլեկտիվը ոչ թե արգելակում, այլ հակառակը, նպաստում է անձի զարգացմանը

[1]: Այսպիսով, սոցիալական հոգեբանության գլխավոր խնդիրներից մեկը հաղորդակցության խնդիրն է: Հետաքրքրությունը դրա նկատմամբ որոշվում է այն հսկայական դերով, որ այն կատարում է անձի կայացման և զարգացման գործում [7, էջ 189]: Անմիջական և միջնորդավորված հաղորդակցման ընթացքում մարդը ստանում է իրեն շրջապատող աշխարհի մասին գիտելիքներ, յուրացնում է մշակութային և սոցիալական այն արժեքներն ու նորմերը, որոնք ստեղծված են մարդկության զարգացման պատմական ընթացքում: Այս կերպ կառուցված սոցիալական միջավայրը մարդկանց հասարակական-պրակտիկ գործունեության միջավայրն է: Նրանում գոյությունն արդեն իսկ ենթադրում է համատեղ գործունեության մասնակցություն [3, էջ 51]:

Խոսելիս անձի կրոնական նույնականացման մասին՝ մենք նույնպես առնչվում ենք սոցիալական միջավայրում կատարվող հաղորդակցման տարբեր ձևերի հետ: Դրանց յուրահատկությունը կայանում է նրանում, որ անձն ունի հաղորդակցության երկակի բնույթ. նա հաղորդակցվում է ինչպես իրեն շրջապատող սոցիալական միջավայրում գտնվող այլ անձանց հետ, այնպես էլ պատկերցումային մակարդակում՝ գերբնական աշխարհի հետ, որն այդ միջավայրի խորհրդանշանային արտացոլումն է: Անձը ապրում և գործում է հասարակության ներքո: Հայտնի է, որ նրա գործունեությունը կրում է հասարակական բնույթ, պայմանավորվում է բազմաթիվ միջնորդավորված և անմիջական կապերով: Դրանք զարգանում են այն սոցիալական հանրույթներում և այն մշակութային միջավայրում, որոնցում ընդգրկված է տվյալ գործունեության սուբյեկտը: Գոյություն չունի հասարակությունից բացառա-

պես մեկուսացված գործունեություն, ինչպես նաև՝ մեկուսացված անձ: Այս դրույթը հանգում է անձի՝ սոցիալական միջավայրում տարածական մտածողության ձևավորմանը, այլ էթնիկ խմբերի հետ համեմատության և սեփական էթնոկրոնական ինքնատիպության գիտակցմանը:

Մի շարք հեղինակներ հատուկ ուշադրության են արժանացրել անձի տարածական մտածողության կայացման գործում սոցիալական ինքնության հարցադրումներին, որոնք նույնպես անուղղակի կերպով մատնանշում են անձի էթնիկ ինքնության զանազան դրսևորումները [4, էջ 103–112; 5, էջ 60–68; 10, էջ 48–66]:

Անձի նույնականացման հոգեբանական ուսումնասիրության հարցում ներդրում է կատարել Ս.Կ.Նարտովա-Բոչավերը: Նա անդրադարձել է անձի սոցիալական նույնականացման հարցերին անձի հոգեբանական տարածության բնորոշման շրջանակներում:

Հետևելով անձի հոգեբանական տարածության Ս.Կ.Նարտովա-Բոչավերի ձևակերպմանը՝ մենք այն նշանակում ենք որպես «կեցության սուբյեկտիվորեն կարևորվող ձև», որը բնորոշում է անձի ակտուալ գործունեությունը [14, էջ 27–36]: Ըստ Վ.Ի.Սլոբոդչիկովի, հոգեբանական տարածությունը ներառում է ֆիզիկական, սոցիալական և հոգեբանական երևույթների մի ամբողջ համալիր, որոնց հետ անձն իրեն նույնականացնում է: Այն ներկայացված է վեց չափանիշների միջոցով, որոնց դեպրիվացիան վկայում է հոգեբանական տարածության սահմանների խախտման մասին [16]: Փաստորեն, հոգեբանական տարածության եզրույթը, իր մեջ ներառելով անձի սոցիալ-հոգեբանական հատկանիշները, ունակ է արտահայտելու նաև անձի էթնոկրոնական նույնա-

կանացման յուրահատկությունները:

Այսպիսով, կարող ենք վկայել, որ անձի կրոնական նույնականացումը՝ ներկայացվելով հոգեբանական տարածության կազմակերպման շնորհիվ, կարող է փոխկապակցված լինել անձի հոգեբանական տարածության դեպրիվացիայի աստիճանով: Սոցիալ-հոգեբանական առումով անձի հոգեբանական տարածությունը ներկայանում է որպես նշանային համակարգ [19, էջ 3-13; 10, էջ 48-55]: Անձի կրոնական գործունեությունը հաճախ անհասկանալի ու տարօրինակ է թվում այլ էթնիկ խմբերի համար: Նախնական հարցման արդյունքները ցույց են տալիս, որ մարդիք չեն էլ ձգտում բացատրել իրենց կրոնական գործունեության մանրամասները, այլ ներկայացնում են դրանք որպես այդպիսին [24; տես՝ 8, էջ 75-82]: Այդ պատճառով անձի կրոնական նույնականացման ներկայությունը հաղորդակցման ընթացքում կրում է խիստ նշանային բնույթ:

Վերը ներկայացված դրույթները պահանջում են խորը, բազմակողմանի ուսումնասիրություն, որն անհրաժեշտ է ամրագրել փորձարարական հետազոտության լայն դաշտով: Այն հնարավորություն կտա հստակեցնել ներկայացված չափանիշների ձևակերպումները և կիրառելի դարձնել անձի սոցիալական նույնականացման ուսումնասիրության ասպարեզում:

Սոցիալ-հոգեբանական հայեցակետից անձի կրոնական նույնականացման դիտարկումը անվերապահորեն ենթադրում է սոցիալական խմբերում անձի ներկայացուցչականությունը: Դրանցից առանձնացվում է էթնիկ խումբը իր կայունության և դրսևորման այլ հատկանիշների շնորհիվ: Անձի կրոնական հատկանիշներն արտացոլվում և որակավորվում են շրջապատում իրենց

համապատասխան ընկալման տեսակետից: Այլ խոսքերով, անձի կրոնական նույնականացման սոցիալ-հոգեբանական քննությունը ուղղակիորեն վերաբերում է էթնիկ ինքնության դրսևորման մանրամասներին: Ուստի, անձի կրոնական նույնականացման առանձնահատկությունների լուսաբանումը՝ որպես առանձին ուսումնասիրության առարկա, կարիք ունի տեսական և մեթոդաբանական մոտեցումների ճշգրտմանն ու ներկայացմանը:

Խնդրի հետազոտման մեթոդաբանական մոտեցումները կարելի է ենթարկել տարբեր դասակարգումների: Դրանք կախված են ուսումնասիրության նպատակներից և նրանց լուծման կոնցեպտուալ դիրքորոշումներից:

Անձի կրոնական նույնականացման կոնցեպտը տիրապետում է բազմաթիվ հնարավորություններով, որոնք թույլ են տալիս մեկնաբանել տարբեր սոցիալական կապերը և անհատների փոխհարաբերությունները: Ընդգրկվելով սոցիալական նույնականացման եզրույթի մեջ, այն տալիս է անձի սահմանումը խմբային հասկացությունների միջոցով այնպես, որ անձը կարողանում է իրեն նկարագրել խմբի մեջ ներգրավվելու շնորհիվ: Անձի ներ- և միջ-խմբային արտահայտությունների քննությունը հանգեցնում է կրոնական հատկանիշի դիտարկմանը որպես էթնիկ ինքնության ուսումնասիրության մեթոդաբանական սկզբունք:

Անձի կրոնական նույնականացումն ունի մեծ նշանակություն էթնիկ ինքնության արտահայտության համար: Սոցիալ-հոգեբանական հայեցակետից այն դիտարկելու համար կարող են անցկացվել միջժակութային համեմատություններ այլ էթնիկ խմբերի էթնիկ ինքնությունների դրսևորումների հետ: Կարող ենք փաստել, որ անձի կրոնա-

կան նույնականացումը ստանում է էթնիկ ինքնության կայուն հատկանիշ գերազանցապես այն դեպքում, երբ անձը համեմատում է սեփական խմբի հատկանիշները այլ էթնիկ խմբի հետ: Այդ դեպքում օտար խումբը ներկայացվում է որպես այլ, «օտար» հավատք ունեցող մի խումբ՝ ի դեմս յուրայինների խմբի, որոնց դավանանքի նկատմամբ վերաբերմունքը կրում է էթնոներկայացուցչական և էթնոպահպան բնույթ:

Կրոնական նույնականացման ներկայությունը էթնիկ ինքնության կառուցվածքում կարող է մասնակիորեն պայմանավորված լինել տվյալ հասարակության կոնսերվատիվ բնույթով, մասամբ էլ՝ այն հանգամանքով, որ կրոնական նույնականացման արդյունքում ձևավորվում են էթնիկ ինքնության որոշակի արժեքները և, խոսելիս ազգային, էթնիկ արժեքների մասին՝ անձը անպայման հղում է կատարում կրոնական նույնականացման փաստին:

Կրոնական նույնականացման գործառնությունը էթնիկ ինքնության մեջ պայմանավորված է ներքին և արտաքին մի շարք գործոններով: Ներքին գործոնն ի հայտ է գալիս անձի էթնիկ յուրօրինակությունն արտահայտելու և այլ էթնիկ խմբերին ներկայացնելու ժամանակ: Արտաքին գործոնը կապված է միջէթնիկ հարաբերությունների պատմականորեն ձևավորված գործընացներով և համաշխարհային գլոբալիզացիայի միտումներով, երբ փոքր էթնիկ խմբերը ձգտում են ընդգրկվել համաշխարհային կրո-

նական /օր., քրիստոնեական կամ մահմեդական աշխարհ/ կամ այլ խմբավորումների մեջ [23, էջ 201]:

Ուստի, հայերին՝ որպես փոքր էթնիկ խումբ, բնորոշ է ինտեգրման երկու ոլորտ՝ աշխարհով մեկ սփռված հայկական սփյուռքի և, ընդհանուր առմամբ, քրիստոնեական աշխարհի հետ նույնացումը: Այսպես, հայերն իրենց ազգային պատկանելությունը ցուցադրում են իրենց քրիստոնյա առավել ևս՝ աշխարհում առաջին քրիստոնյա, լինելով: Դրա մեկ այլ վկայություն է հաճախ հանդիպող «հայերը՝ քրիստոնյա ազգ» արտահայտությունը, ուր պարզ երևում է կրոնական և էթնիկ ինքնությունների նույնացումը:

Ամփոփելով վերը նշված գիտական մոտեցումների ընտրանին, կարող ենք վկայել անձի կրոնական, իսկ լայն իմաստով, սոցիալական ինքնության վերաբերյալ գիտական մտքի աստիճանական զարգացման մասին: Նույնականացման եզրույթը՝ ձևավորվելով անձի ընդհանուր հոգեբանության շրջանակներում, նախ իր արտահայտությունն է գտել միջխմբային հարաբերությունների հոգեբանության մեջ, այնուհետև զարգացել է շնորհիվ գիտակցության փոփոխված վիճակների ուսումնասիրությունների և ընդգրկվել սոցիալ-հոգեբանական հետազոտությունների շրջանակում որպես սոցիալական նույնականացման երևույթ:

*Հոդվածի ներկայացման փարեթիվը՝ 09. 10.2013 թ.*

## ՓՐԱՇԱՆՈՒԹՅՈՒՆ

1. **Бехтерев В. М.**, Данные эксперимента в области коллективной рефлексологии.–В кн.: Новое в рефлексологии и физиологии нервной системы, Л.–М., 1925, –336 с.
2. **Бехтерев В. М.**, Избранные работы по социальной психологии, М., 1994, –400 с.
3. **Бусс Н.А.**, Семантическая основа взаимопонимания. Семантика и социальная психология, Фрунзе, 1976, –154 с.
4. **Величковский Б. М., Блинникова И.В., Лапин Е.А.** Представление реального и воображаемого пространства; Вопросы психологии, №3, 1986, М., Педагогика, 192 с.
5. **Каплунович И. Я.** Психологические закономерности развития пространственного мышления; Вопросы психологии, 1999, №1, Москва.– 128 с.
6. **Кляйн М., Айзекс С., Райвери Д., Хайманн П.** Развитие в психоанализе. Москва. 2001.
7. **Кольцова В. А.** Опыт экспериментального изучения познавательной деятельности в условиях общения.–В кн.: ред. Шорохова Е.В., Методология и методы социальной психологии, Москва, 1977. –247 с.
8. **Курбаткина Ю. В.** Процесс сепарации и индивидуации с точки зрения традиции объектных отношений и Я–психологии,– Психология и жизнь, Москва: МОСУ, 2001, Вып. 2.
9. **Кучеренко В. В., Петренко В. Ф., Россохин А. В.** Измененные состояния сознания: психологический анализ; Вопросы психологии, 1998, № 3, М.,– 160 с.
10. **Левин К.** Теория поля в социальных науках, СПб, 2000.– 368 с.
11. **Леонтьев А. Н.** Проблемы развития психики, Москва, 1965.
12. **Леонтьев Д. А.** Самоактуализация как движущая сила личностного развития: историко–критический анализ, в кн.: Леонтьев Д. А., Современная психология мотивации, М., 2002.– 343 с.
13. **Малиновский Б.** Магия, наука и религия.
14. **Нартова–Бочавер С. К.** Понятие “психологическое пространство личности”: обоснование и прикладное значение; Психологический журнал, том 24, № 6, 2003, “Наука”, Москва,– 128 с.
15. **Никольская А. В.** Теория отражения vs конструктивизм; Вопросы психологии 2010, № 1, М., 176 стр., с. 67.
16. **Слободчиков В. И.** Ступени развития субъектности,– <http://murzim.ru/nauka/psihologija/vozrastnaja-psihologija/27080-stupeni-razvitiya-subektnosti-po-vi-slobodchikovu.html/>
17. **Фрейд. З.** Введение в психоанализ: Лекции. М., «Наука», 1989
18. **Фрейд. З.** Тотем и табу. Психология первобытной культуры и религии, М., 1991.
19. **Чудновский В. Э.** К проблеме соотношения “внешнего” и “внутреннего” в психологии,– Психологический журнал, 1993, т.14, № 5.
20. **Элиаде М.** Очерки сравнительного религиоведения, Москва, 1999.
21. **Эриксон Э.** Идентичность: юность и кризис,– М.: Прогресс, 1996.
22. **Юнг К. Г.** Архетип и символ, Москва, 1991.
23. **Хачатурян В. М.** 1998.История мировых цивилизаций. Москва. 1998.
24. **Խաչատրյան Մ. Փ.** Դաշտային նյութեր, 1992–1995 թթ:
25. **Tajfel, H. and Turner, J. C.** The social identity theory of inter–group behavior. In S. Worchel and L. W. Austin (eds.), Psychology of Intergroup Relations. Chigago: Nelson–Hall, 1986.

РЕЛИГИОЗНОЕ САМОСОЗНАНИЕ ЛИЧНОСТИ С СОЦИАЛЬНО–  
ПСИХОЛОГИЧЕСКОЙ ТОЧКИ ЗРЕНИЯ

**ГЕВОРКЯН СРБУИ**

*Проректор по научно-учебной работе Армянского  
государственного университета имени Хачатура Абовяна,  
доктор психологических наук, профессор*

**ХАЧАТРЯН АННА**

*Соискатель кафедры развития и прикладной психологии факультета  
психологии и социальной педагогики Армянского государственного  
университета имени Хачатура Абовяна*

В статье представлены особенности социально–психологического обзора религиозной идентичности личности, методологические подходы и научные прогнозы дальнейшего исследования. Проблема освещается посредством определения социальной идентичности личности, определяются социально–психологические формы выражения личности в социальной среде.

*Дата представления статьи: 09.10.2013 г.*

PERSON'S RELIGIOUS IDENTIFICATION FROM THE SOCIAL–PSYCHOLOGICAL  
PERSPECTIVE

**SRBUHI GEVORGYAN**

*Vice-rector of ASPU of Kh. Abovyan,  
Doctor of Psychological Sciences Professor*

**ANNA KHACHATRYAN**

*Applicant of the chair of Development and Applied Psychology,  
Faculty Education Psychology and Sociology*

The article presents the ways of socio–psychological investigation of a person's religious identity and the essentials of methodology. The problem is delivered by the term of a person's social identity, socio–psychological forms of self–expression in social surroundings are also being determined.

*Article submission date 09.10.2013*